

# INUIT ATAQATIGIIT

## INATSISARTUNI



UKA 2013/129  
17. oktober 2013  
Kalistat Lund

**Pisortat illuutaat A/S Ini-miit aqunneqartut suli imermut attaveqanngitsut tamarmik attavilersorneqarnissaasa pilersarusiornissaa siunertaralugu Naalakkersuisut suliassamik piareersaasioqqullugit peqquneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasortaq Doris Jakobsen, Siumut)

Inatsisartunut Ilaasortap Doris Jakobsen-ip, pisortat illuutaasa A/S INI-miit aqunneqartut imermullu attavilerneqarsimanngitsut tamarmik attavilerneqarumaarnissaat siunertaralugu pilersarusiortoqarnissaannik Naalakkersuisut piareersaasioqqullugit peqquneqarnissaannik siunnersuutaa, Inuit Ataqatigiit-niit ima isumaqarfigaarput:

Inuit Ataqatigiit-ni tunngaviumik isumaqarpugut, anguniagassaattillugulu, inuit nunatsinni tamarmik naammagisimaakkaminnik ullutsinnullu naleqquttunik najugaqarfeqarnissaat. Minnerunngitsumik peqqissutsimik attassiuarsinnaannissamut najukkat innarliisuunnginnissaat pingaartillugu.

Illu ullutsinnut naleqquttoq tassaasoraarput, angissutsimigut inoqutigiinnut naammattoq, oqorsarluagaq, silaannarissarluarneqarsinnaasoq, sarfamut, kuuffinnut imermullu attavilik. Pisortat illuutaanni tamakku tamakkiisumik anguneqarsimanngimmata isumaqarpugut aaq-qitassatut siunnerfigalugit najugaqarfitsigut ineriartortitsissasugut.

Siunnersuuteqartup illut pisai pitsaasutsimikkut assigiinngitsorujussuarmik inissimasimasasut qularutiginnilarput. Taamaammallu aamma najugaqarfiit amerlasuut, imermut attavilerinnerinnaasigut pitsaassutsimikkut piumasarisatsinnut naappertuutilernissaat anguneqarnaviarani. Qularnanngilaq aamma illut ilaat naliliivigineqartariaassapput, imermut kuuffinnullu attavilerfissaginnerusunut nuullugit, nutaanik illuliuinnaraanni akilersinnaannerusasanginnerusooq.

Siunnersuuteqartup siunertaa paasilluaraluarlugu, isumaqarpugut najugaqarfigissaaniarnitsinni imermut attaviliinissamik pilersarusiortitsiniarneq kisimi amigartoq. Aningaasarparujussuit matumani atorineqarumaartariaqarumaarmata illunut nutarteriffigineqarnissaminnut naleqqutinngitsunut atulussinnaaginnarsinnaanneq mianerisariaqarsoraarput.

Isumaqarpugut nunatsinni najugaqarfitsigut pitsanngorsaassagutta, pisortat kommunillu siunnerfeqaqatigiinnissaat pisariaqartoq, naammanngilarmi imermut attavilerneqarneq imeq illumut iserumaartussaag aamma illumiit aniumaassammat, matumani kuuffiit suli ernumut attavilertinnermiit akisunerit aamma pisariaqartinneqassammata, aqqiinniarneq pikassattumik suliarineqassanngippat.

Naalakkersuisut allannguutissatut siunnersuutaat ilaatsigut isumaqatigaarput, kisianni tamakkiisuunerusumik aqqiissutaasussamik siunnerfeqarnissaq kissaatigalugu ataatsimiititaliami suleqataaffigissavarput.

Inuit Ataqatigiit-niit taama oqaaseqarluta Inatsisartut Sanaartornermut Ataatsimiititaliaani nalilersorneqarlunilu suliarineqarnissaa inassutigaarput.